

admovens; pugnatoris arcus nervus, semel ad aurem usque intensus, gignebat quasi sagittas mortiferas.

55. Sparsit ille terram hostium capitibus, quorum labia iræ morsu rubra erant, distinctas rugas sursum contractas ferentibus, sagittarum ictu cervicibus detruncatis, sævumque vultum ostendentibus.

56. Illum adorti sunt cuncti reges accerrimo impetu, cunctis exercitus agminibus, elephantis et reliquis, omnibus telis loricas perrumpentibus.

57. Ille, curru multis hostium telis obruto, solo vexilli cacumine erat cognoscendus, sicut prima dies, nive mersus, sole paullulum orto.

58. Summi regis filius juvenis, pulcher veluti amoris deus floribus armatus, nequaquam quietis cupidus, telum *Gandharvicum*, a PRIYAMVADA acceptum, obstupefaciens, contra reges adhibuit.

59. Illico regum exercitus, somno oppressus, stetit manibus in arcu tendendo impeditis, galearum retibus in humeros delapsis, corpore vexillorum perticis innixis.

60. Deinde juvenis, concham admovens labris suis, quæ amatae gustum perceperant, inflavit illam, apparuitque unus ille vir ac si gloriam manibus suis collectam, corpore indutam imbiberet.

61. Illius milites, conchæ sono recognito aggressi conspexerunt illum inter hostes devictos, veluti lunam, illi similem, micantem in lotorum sopitarum medio.

62. Scripsitque ille sagittarum cuspidibus, cruore tinctis, in regum vexillis hæcce verba: "Hodie gloria vestra a RAGHUIDA erepta est, propter misericordiam vero non itidem vita vestra!"

63. Ille uno brachio in arcus extremitatem innitens, crinibus galea detracta dilapsis, fronte sudoris guttis tecta, ad amatam accedens sic locutus est:

64. "Adspice, *Vidarbhensis*, hostes, quorum arma vel ab infante eripi possent, meam veniam habes; tali pugnæ molimine tu, quæ in meam potestatem venisti, ab istis expetiris!"

65. Ejus vultus, liberatus ab hostium timore, illico splenduit veluti speculum, quod, postquam halitus vapor evanuit, proprium nitorem recepit.